

資治通鑑

冊一

東坡志林

卷一

資治通鑑

四部備要

史部

上海中華書局據鄱陽胡氏仿元本校刊

桐鄉陸費達總勘

杭縣高時顯輯校

杭縣吳汝霖校

丁輔之監造

興文署新刊資治通鑑序

古今載籍之文存於世者多矣苟不知所決擇而欲遍觀之則窮年不能究其辭沒世不能通其義是猶入海弄沙成功何年善乎孟子之言曰堯舜之智而不遍知急先務也大抵士君子之學期於適用而已馳騫乎高遠陷溺乎異端放浪於詞華皆不足謂之學矣易曰君子多識前言往行以畜其德說命曰學古入官議事以制政乃不迷若此者可謂適用之學矣前脩司馬文正公遍閱歷代舊史旁採諸家傳記刪繁去冗舉要提綱纂成資治通鑑二百九十四卷上起戰國下終五季一千三百六十二年之間賢君令主忠臣義士志士仁人興邦之遠略善俗之良規匡君之格言立朝之大節叩函發帙靡不具焉其於

前言往行蓋兼畜而不遺矣其於裁量庶事蓋擬議而有准矣士之生也苟無意於斯世則已如其抱負器業未甘空老明時將以奮發而有爲也其於是書可不熟讀而深考之乎

朝廷憫庠序之荒蕪歎人材之衰少乃於京師勅立興文署署置令丞并校理四員咸給祿廩召集良工剡刻諸經子史版本頒布天下以資治通鑑爲起端之首可謂知時事之緩急而審適用之先務者矣噫遐鄉小邑雖有長材秀民嚮慕於學而無書可讀憫默以空老者多矣是書一出其爲天下福澤利益可勝道哉昔圯上老人出袖中一書而留侯爲萬乘師穆伯長以昌黎文集鏤板而天下文風遂變今是書一布不及十年而

國家人材之盛可拭目而觀之矣翰林學士王磐序

因宋人林文盛回林目而贈之老韓林學士王隱所

觀前古興衰治亂之迹鎔冶於胸而經濟之儒出焉  
歷代史冊繁矣鄉僻老宿或終身不睹全史庋藏家  
泛有丹黃恆困不終卷一二記誦之士矻矻窮年抑  
核於名物而遺取義之要彂列制作不箸損益得失  
之歸學無所衷故博聞而眇適於用經世之務與史  
學歧爲二端不以病乎宋司馬溫公匯萃十七史采  
用雜史二百餘種作資治通鑑自綱常之鉅治平經  
久之規極諸軍國艱難措畫之際變而通之莫不裁  
以至當不易之理使天下後世曙然於法戒所在洵  
羣史之綱領求治之津涂也

日昌奉

命撫吳幸處東南亂定之後奏設書局首刊牧令  
書若乃通括治體經緯萬端上下數千年固莫盛於  
通鑑爰議覆鄱陽胡氏仿元本從二百九十四卷授

工逆而上之已就四十許卷則聞胡氏板尙存其家  
輾轉物色購得之板至則二百八卷已下燬他卷差  
完新舊適相銜接新刊者八十七卷釋文辨誤十二  
卷起戊辰四月迄今今年二月書成並上海致通鑑目  
錄宋刊本常熟致鄱陽胡氏通鑑外紀注未刊本次  
第付梓而蘇松太兵備道應君寶時先從嘉興所收  
鎮洋畢氏續通鑑板已議歸書局於是自伏羲降至  
元季編年紀事之書燦然大備外紀注本晦五十年  
復出與天台胡注並行豈具有數存邪嘗論古今賢  
豪任天下之重恃才學識三者而才與識生於學讀  
通鑑一書知夫用人行政開物成務強本抑末杜漸  
防微後之人百思不得者前之人先我行之或所未  
行存其說以詔來世而因時變通之道思深者有同

揆焉方今中原蕩滌百姓想望治平亟賴吾黨偉杰  
君子起而振之讀有用之書爲有用之學請與海內  
士大夫勉勉焉共守是編其可乎時

同治八年春三月癸酉朔

誥授資政大夫兵部侍郎兼都察院右副都御史巡  
撫江蘇等處地方提督軍務兼理糧餉加三級豐  
順丁日昌謹序



資治通鑑序

御製

朕惟君子多識前言往行以畜其德故能剛健篤實  
輝光日新書亦曰王人求多聞時惟建事詩書春秋  
皆所以明乎得失之迹存王道之正垂鑑戒於後世  
者也漢司馬遷紬石室金匱之書據左氏國語推世  
本戰國策楚漢春秋采經摭傳罔羅天下放失舊聞  
考之行事馳騁上下數千載閒首記軒轅至于麟止  
作爲紀表世家書傳後之述者不能易此體也惟其  
是非不謬於聖人褒貶出於至當則良史之才矣若  
稽古

英考留神載籍萬機之下未嘗廢卷嘗命龍圖閣直  
學士司馬光論次歷代君臣事迹俾就秘閣繙閱給

吏史筆札起周威烈王訖于五代光之志以爲周積  
衰王室微禮樂征伐自諸侯出平王東遷齊楚秦晉  
始大桓文更霸猶託尊王爲辭以服天下威烈王自  
陪臣命韓趙魏爲諸侯周雖未滅王制盡矣此亦古  
人述作造端立意之所繇也其所載明君良臣切摩  
治道議論之精語德刑之善制天人相與之際休咎  
庶證之原威福盛衰之本規模利害之効良將之方  
略循吏之條教斷之以邪正要之於治忽辭令淵厚  
之體箴諫深切之義良謂備焉凡十六代勒成二百  
九十六卷列于戶牖之閒而盡古今之統博而得其  
要簡而周于事是亦典刑之總會冊牘之淵林矣荀  
卿有言欲觀聖人之迹則於其粲然者矣後王是也  
若夫漢之文宣唐之太宗孔子所謂吾無閒焉者自

餘治世盛王有慘怛之愛有忠利之教或知人善任  
恭儉勤畏亦各得聖賢之一體孟軻所謂吾於武成  
取二三策而已至于荒墜顛危可見前車之失亂賊  
姦宄厥有履霜之漸詩云商鑑不遠在夏后之世故  
賜其書名曰資治通鑑以著朕之志焉耳

治平四年十月初開

經筵奉

聖旨讀資治通鑑其月九日臣光初  
進讀

面賜

御製序令候書成日寫入



新註資治通鑑序

古者國各有史以紀年書事晉乘楚檮杌雖不可復見春秋經聖人筆削周轍既東二百四十二年事昭如日星秦滅諸侯燔天下書以國各有史刺譏其先疾之尤甚詩書所以復見者諸儒能藏之屋壁諸國史記各藏諸其國國滅而史從之至漢時獨有秦記太史公因春秋以爲十二諸侯年表因秦記以爲六國年表三代則爲世表當其時黃帝以來諜記猶存具有年數子長稽其歷譜諜終始五德之傳咸與古文乖異且謂孔子序書略無年月雖頗有然多闕夫子之弗論次蓋其慎也子長述夫子之意故其表三代也以世不以年汲冢紀年出於晉太康初編年相次起自夏殷周止魏哀王之二十年此魏國史記脫